

# LÉBITIKO

## Ini Sa Igsulat I Mosis Denu Sa Galebek Sa Medoo Tegesimbà

### Ini Denu Sa Libelu Lébitiko

*Na, ini sa igsulat i Mosis anì selepangen di sa galebek sa medoo tegesimbà tugod i Lebi, huenan di Lébitiko sa ngadan siini libelu. Egselepangen ma siini igsulat i Mosis sa medoo uledin igsugù i Datù Nemula denu sa adat kesimbà sa medoo tegeIslaél diyà kenagdi owoy denu sa adat da kenà di netuuwan. Na, danà siini medoo uledin di, egketiigan sa medoo tegeIslaél tigtu eglowon Datù Nemula i diyà sa langun épê egkegaga danà sa adat di tigtu metiengaw. Huenan di, endà mekeangay sa etaw diyà kenagdi amuk endà ma metiengaw di. Dodoo mebaluy doo kumetiengaw sa etaw diyà sa kehaa i Nemula danà di tigtu egpangunut diyà sa medoo uledin di.*

*Metaes sa libelu Lébitiko, dodoo tukééy daa sa nekesulat diyà sa kagi Menubù.*

### Neamu Sa Binaelan Sa Duwa Anak I Alon Diyà Sa Dakel Kemalig

*(Lébitiko 10:1-5)*

**10** <sup>1</sup>Na, sebaen agdaw ini sa binaelan sa duwa maama anak i Alon, si Nadab owoy si Abihu. Migkuwa da sigbaenay sa atung taguan apuy owoy dinaleman da sa apuy, agulé eg-ulowen da sa mepion ngadeg diyà sa taengan i Datù Nemula. Dodoo endà egketuuwan Nemula i diyà sa binaelan da enù ka endà igsugù di duu. <sup>2</sup>Huenan di, petow dé migsiglob sa apuy danà i Datù Nemula, hê nematay da diyà sa taengan di. <sup>3</sup>Agulé mig-ikagi Mosis i diyà si Alon, guwaen di, “Ini sa selepangan sa inikagi i Datù Nemula, guwaen di, Meadatan a doo sa langun etaw eg-angay diyà kenak enù ka tigtu a metiengaw, owoy meolò a ma sa langun etaw.”

Dodoo endà mekesagbi Alon i.

<sup>4</sup>Agulé inumow i Mosis Misaél i owoy si Ilsapan, sa duwa anak i Usiyél momò da i Alon. Egoh da migtebow, guwaen di diyà kenagda, “Angay yu kuwa sa duwa anak sa duma telahadi yu nematay diyà siini mapulù simbaan ta, owoy uwit yu diyà sa dibaluy sa kenà ta mig-esud.” <sup>5</sup>Huenan di, kinuwa da sa nematay tapay doo migginiis sa ginis tegesimbà owoy inuwit da diyà dibaluy sa kenà da mig-esud, enù ka iya sa igsugù i Mosis diyà kenagda.

### **Ini Sa Uledin I Nemula Denu Sa Agdaw Kepegeni Da Sa Kepeuloy Salà**

*(Lébitiko 16:1,29-34)*

**16** <sup>1</sup>Na, nematay sa duwa maama anak i Alon danà i Nemula endà netuuwan diyà sa binaelan da egoh da mig-ulow sa igbegay da mepion ngadeg diyà sa taengan i Datù Nemula. Agulé mig-ikagi Datù Nemula i diyà si Mosis, <sup>29</sup>guwaen di, “Pangunuti yu taman melugay ini i uledin igsugù ku. Amuk meuma sa kesepulù di agdaw diyà sa kepitu di gebulan uman palay, peulan yu sa kekaen yu owoy yoko ma eggalebek ka, iling ka sa duma yu tegeIslaél ataw ka sa beken tigtu etaw eg-ugpà diyà sa tanà yu. <sup>30</sup>Enù ka amuk meuma iya wé agdaw, duen sa baelan sa tegesimbà anì mekepeuloy sa salà yu owoy anì kumetiengaw yu diyà sa kehaa ku, aken i Datù Nemula. <sup>31</sup>Nebaluy mapulù agdaw iya wé agdaw keetud egoh yu egpeulan sa kekaen yu owoy sa endà kegalebek yu. Pangunuti yu sa uledin denu siini mapulù agdaw taman melugay. <sup>32</sup>Na, sa Tigtu Ulu-ulu Tegesimbà daa sa mael ini i anì mekepeuloy sa salà yu, enù ka kagdi sa nehemilì nekesetugdug diyà sa emà di sa anay Tigtu Ulu-ulu Tegesimbà. Ini sa baelan di, ikawal di sa tigtu mepion ginis sa atung eginisen sa tegesimbà, <sup>33</sup>owoy duen ma sa baelan di anì kumelanih diyà sa kehaa ku sa Tigtu Mapulù Bilik diyà sa simbaan yu owoy sa Dakel Kemalig kenà yu egkesetipon owoy sa atung kenà yu eg-ulow sa ibegay yu diyà kenak. Isimbà di ma anì mepeuloyon salà sa medoo tegesimbà owoy sa langun tegeIslaél ma. <sup>34</sup>Na, pangunuti yu ini i uledin taman melugay. Segulê daa uman palay sa kebael yu iya wé anì mekepeuloy sa salà sa langun tegeIslaél.”

Huenan di, pinangunutan i Mosis iya wé igsugù i Datù Nemula diyà kenagdi.

### **Ini Sa Medoo Uledin I Nemula Anì Mesehidu Ki**

*(Lébitiko 19:1-2,11-18)*

**19** <sup>1</sup>Na, mig-ikagi Datù Nemula i diyà si Mosis, guwaen di, <sup>2</sup>“Tulon ko sa kagi ku diyà sa langun tegeIslaél. Ini sa ikagi ko, ‘Petiengaw yu dé, enù ka aken i Datù Nemula egpigtuuwen yu sa metiengaw.’”

<sup>11</sup>Guwaen i Nemula, “Yoko egpenakaw wa, owoy yoko ma egseakalay ya. Yoko ma egbutbut ta diyà sa duma yu. <sup>12</sup>Yoko egpengibet duu sa ngadan ku amuk endà duen sa pedu yu egpetuu sa igpasad yu, anì endà mesumbung a, aken i Datù Nemula sa egpigtuuwen yu.

<sup>13</sup>“Yoko eglapis sa, owoy yoko ma eglampas sa. Yoko eg-éngén duu taman segesigep sa sukay sa etaw egpegalebeken yu. <sup>14</sup>Yoko egtubad duu sa etaw bisuwen, owoy yoko ma egselabit duu sa langap anì endà mekelagkeb di. Dodoo adati yu aken i Datù Nemula sa egpigtuuwen yu.

<sup>15</sup>“Na, amuk eg-antang yu, petudà yu sa kepeukit yu. Yoko egpedakel duu sa pubeli etaw owoy yoko ma egpeunut duu sa penemdem yu diyà sa kawasà etaw. Dodoo petudà yu polo sa keantang yu sa duma yu.

<sup>16</sup>Yoko egsumbung duu sa etaw. Owoy yoko ma egbael duu sa pesuwan di meimatayan sa duma yu etaw, enù ka aken si Datù Nemula.

<sup>17</sup>“Yoko egkelepuh duu sa duma yu. Dodoo ikagi yu polo mepion diyà sa duma yu anì endà mekesalà yu. <sup>18</sup>Yoko egsulì ya owoy yoko ma egpelugay duu sa kekelepuh yu sa duma yu. Dodoo hiduwi yu polo sa duma yu éhê mendaa sa kehidu ko keniko. Aken si Datù Nemula.”